



O Volapükafleens Valöpo!

Su pad teldeg gasedila amulik kanols logön sami Volapüka rigik. Setrat binon se buk balid (kapit telid) „Dö Sümädot Kristusa” fa pädan Thomas à Kempis, e fa pädan Pinth Yoh Bapt petradutöl. Buk at äpubon ün yel 1898. Ma tiäd, el P. Y. Bapt äbinom pädal in Rollingen (Lamadeleine) lä Rodingen (Rodange) in Luxemburgän, e klüliko äbinom i slopan lanälik Volapüka. Finü buk, pädan Johann Martin Schleyer, Datuval Volapüka, id äpenom digidi voba fa pädan Bapt pefidunöla.

Danob ladöfiko fleni Jean-Marie Ries in Luxemburgän, kel esedom obe kopiedi buka at.

Kos vödem in Volapük rigik, kanols i logön vödemi me Volapük nulädik pelautöli. Sekü atos, okanols fasiliko leigodön püki rigik lä pük fa Arie de Jong perevidöl. Pos xam brefik pükas tel, cedob, das otuvols, das vobod fa Arie de Jong egudükumon Volapüki, kel binäliko blebon pük fa J. M. Schleyer pedatiköl. Ab fimo no vilob suseitön cedi obik su reidans. Dareidolsös, begö! vödemis tefik tel, e penolsös obe, begö! cedis olsik, kelis odabükob ko blesir su pads „Vöga Volapüka.”

Din votik, keli vilob mäniotön oles binon „Gramatagul.” Is logols vödis Volapükik sümik kobü konotil. Reidans pavüdon ad studön vödis at, e poso ad nüpladön vödi verätik vü kläms. Ünü mul bal kanols verätükön vobi olsik. Modü at, okanols gudükumön vödistoki olsik püka. Ba eglömolis sinifi vödas; if so, okanols tuvön vödis tefik su pads büik gasedila. Jünu pubons in dabükots gustula, setula e tobula, yeloda 2002.

Valikosi Gudikün Oles ed Olikanes

sedom

III:18:2004

TONATAN LEGUDIK-LI?

Janin: He! Karl - binol-li tonatan gudik?

Karl: Lesi!

Janin: Sevol-li vödi „hidrinapärloxid?“

Karl: Si! Elilob oni seimüpo.

Janin: Kanol-li tonatön atosí?

Karl: Si! fasiliko. a-t-o-s-i !

NO SEVOY KURATIKO . . .

Stefan: Kisi odunolöv-li, úfo kidoböv oli?

Katlin: Atosi ga no kanob sagön büo.

BLÖF . . . E RET !

Lavogan: Binosöv gudikum, if kanolöv blöfön votöpobini olik.

Ek elogon-li oli tü timül, das midun pädunon?

Dunetäb: Läbiko no!

LEKÄL GUDIKÜN

Dokan: If himatan olik perom dönu sevälöfi, mutol givön ome väreti konyaka.

Jimatan: Du binom-li nesevälöfik? Atosi neai opardomöv obe!

KOD TÄLÄKTIK

Paul: Cedob, das mutob remön toodi nulik.

Frank: Döfi kinik tood bälдик labon-li?

Paul: Tood leno döfon. Ab no kanob pelön fovo dilasuämis.

TU LATIK !

Franz: Yels degtel epasetikons, büä äsüadob, das no älabob lautatäleni.

Walter: Ed eklemol-li osi täno?

Franz: Nö! täno äbinob ya famik!

ZAR E FALOK

Dü yag, zar älivükom faloki oka gönik po liev ed äsökom oni galoto. Falok äplöpon ad fanön lievi. Zar ämosumom oni, täno äprimom ad sukön fonäti ad säsoafükön oki. Donü lubel äbinon tofam vata, kel ätofon nevifiko, tof pos tof, se klif.

Zar äsumom bovüli ed äblinom oni lipes omik ad drinön. Ab falok, kel ästanon su brad oma, ämufükon mäpetiko flitämis ed äspilon vati.

Ab zar äpladom dönu bovüli dis tofam vata et fibik ed ästebedom jüs fulikon bovül. Ye du äblinom oni lipes oka, falok dönu ämufükon mäpetiko flitämis, ed äspilon oni.

Ven, kilidnaedo, zar ätovom bovüli fulik ad drinön se on, i kilidnaedo falok ämufükon flitämis ed äspilon oni. Eperöl sufädi, zar ägleipom bödi ed älejedom oni lezuniko ta klif. Falok ädeadon sunädo.

Tü tim et, älükömons galoto dünans zara. Balan omas älüikom sunädo lü sömit lubela ad tuvön topi, se kel äflumon flumil at vata e ad fulükön bovüli zara.

Ab ägekömom brefüpo poso ko bovül vagik.

„No kanoy drinön vati at,” äsagom. Neflen egifon veneni ini fonät. Äbinos ga läbikos, das falok äspilon vati, keli äprimikol ad drinön. If idrinolöv oni, anu übinol ya deadik . . . ”

Zar ästanom dü timül seiliko.

„Ekö vio emesedob faloki oba. Esavon me naeds kil lifi oba, ed eheidob oni.”

III:20:2004
SMACEDOLÖD OKI!
Fa Pādan Thomas à Kempis

1. Men alik desidom nato, nolön; ye nolüg nen godidred frutom kisi? Gudikum binom vo feilan miugik, dünöl Gode, ka filosopan pleidik, kel luleadölok iti, medidom goni stelas. Kel sevomok gudiko: at smacedomok, e no pafredom dubü lobs menas. If noloböv valikosis binöl in vol, e no binoböv in löf: atos yufosöv obe kisi loü God ocödöföl obi ma vobäds?

2. Stöpolöd desidi tuik nolöna, bi patuvoms niso gretiks dispäl e cit! Nolans vipoms palogön e panemön sapals. Dins mödik binoms, kelas sev frutom lane nemödikosis u nosi. E lestupik binom, kel jäfom dinis votik, ka dünölis oma salude. Vöds mödik no satoms lani; abu lif gudik klietom tikäli, e konsien paklinöl gevom konfidi gretik al Godi.

3. Pluo nolol umosis, e gudikumo bos: plu jalopumo pocödöfol demüs, if no ulifol saludikum. Klu no vilolös, papliedön tefü lekanäv sembal u nolüg, sod bufumo dredolöd demü sev pegivöl ole! If jinos ole, das sevol mödikosis, e kapälol gudik ze : deno nololöd, das dins, kelis no sevol, binoms vemo mödikums! No binolöd pleitälük, sod koefolöz bufum oliki nenolöfi! Kikod vilol, bizugokön eke, do tidels mödik patuvoms nolalikum, ka ol, ed eplakölums in lon? Üf vilol fruto nolön e lenadön bos: löfolöd, blibön nebesevik, e pacedön, aso nos!

4. Atos binos nolüg geilükün e lenadam frutikün: sevön veratiko, e nestümön iti ok. It cedönok, aso nosi, ed aitikön gudikosis e subimikosi dö votans: binos sap gretik e lefuläl geilük. If logolöv votani sinöl maniföfo, u dunön klimotis gretik: deno no dalolöv, cedönok gudikumi, bi no nolol, vio lonedo blibolöx in stad gudik. Valikans binobs döfik; ye neki cedolös döfikumi, ka iti ol!

(Lovepolam kapieda 2, buka balid „Dö Züp Kristusa” fa pādan P. Y. Bapt)

III:21:2004
MŪKŪKOLÖD OKI!
Fa Pādan Thomas à Kempis

1. Men alik desiron nato nolōn; ye nol nen Godidred fruton-li kisi? Gudikum vo binos feilan mŭkik, dŭnōl Godi, ka filosopan pleidik, kel, nekālōl oki it, jāfikom me muf stelas. Utan, kel nolom oki gudiko: atan mŭkŭkomōs oki, bi no pofredom dub lobs menas. If nolobōv valikosi dabinōl in vol, e no binobōv in lōf: atos yufosōv obe kisi-li lo God, kel ocōdom obi ma vobāds?

2. Stōpolōd desiri tuik nola, bi patuvons dubo vanŭkam e lāseti gretiks! Nolans vipoms ad palogōn as nolans votikanes, e ad panemōn sapals. Dins mōdik dabinons, kelas nol fruton lane nemōdikosi u nosi. E lestupik binom utan, kel jāfikom me dins votik, ka me dŭn saluda omik. Vōds mōdik no kotenŭkons lani; ab lif gudik klieton tikāli, e konsien peklinŭkōl givon konfidi gretik lo God.

3. Plu sevol, e plu suemol - plu sevāriko pocōdol, ŭfŭ no ulifol i saludikumo. Klu no vilolōs palobōn tefŭ lekanav semik u nol, ab buikumo dredolōd demŭ sev pegivōl ole! If jinos ole, das sevol mōdikosi, e suemōn gudiko seimosi: too sevolōd, das dins, kelis no sevol, binons vemo mōdikums! No binolōd pleidālik, ab koefolōd buiko oliki nennoli! Kikodo vilol-li buŭkōn oki votikanes, do tidans mōdik patuvons nolikums, ka ol: e skilikumiks in Lon? Ŭf vilolōv fruto nolōn e lārñōn bos: lōfolōd, blebolōd nennemi e cedolōd oki as nos!

4. Atos binon nol geilikŭn e lārnam frutikŭn: nolōn veratiko oki, e nestŭmōn oki it. Cedolōd oki as nos, e cedolōd ai gudikosi e sublimikosi votikanis : binos sap gretik e jenōfŭkam geilik. If logolōv votikani maifiko sinōli, u dŭnōli miduni gretik: too no sōtolōv ad cedōn oki gudikumani, bi no sevol, violuniko oblebol in stad gudik. Valikans binobs dōfiks : ye neki cedolōs dōfikumi, ka ol it!

(Tradutod kapita 2, buka balid „Dō Sŭmādot Kristusa” fa pādan P.Y.Bapt)

GRAMATAGUL

IF / IFI / IFÜ / ÜF / ÜFO / ÜFÜ

Sevol-li ad verätiko gebön vöds mäl löpik? Ad blöfön osi, reidolös konotili sököl, täno nüpladolös vödi tefik ini spadil vü kläms :-

Flen gudikün oba binom tedan. () dalaboböv moni lemödik äs om, no voboböv plu. Binom dilekan fiamä veütik. () binoy dilekan, dalaboy nämäti gretik () no voboy mödo. Mutoy-li () vobön mödo? Jinos obe, das () dalaboy toodi jerik e spikoy laodiko, plöpoy vemo. () täv in Litaliyän, äkolkömob tedani Fransänik, kel iplöpom in fiam netik. „() vilol vedön tedan plöpik,” äsagom, „() dalabol moni nemödik, () kondötolöv äs man liegik, mens olöfons oli () pub klotugik.” E kikodo () no sötob-li plöpön? () täv balidkömöi oba lü Litaliyän, obesplikobs dini fovo, tedan Fransänik ed ob.

- - - - -

KONOTIL FEBULA

(Vöds verätik pubons in tonats slobik)

Labob fleni gudik, kel *blibom* lä ob. Do binom man yunik, verato *blebom* cil cedü pals okik. Ün del seimik *äbleibom* kanitön dü tim lölik, bi äbinom so fredik. Tü vigafin *blibom* ai in dom. *Blebom* reidön bukis nitedik. Plidom vemo pükis. Estudom i Volapüki, ed *oblebom* ai flen mekavapüka at. *Blebom* fümik tefü din at: *obleibom* ai vobön pro Volapük. Binom is ed *oblibom* dis nuf obik jü dead oba. Odalom-li *blibön* in dom pos dead oba? *Ebleibobs* bespikön kobo säki at, ab jünü no *blebobs* pesüädüköls dö sek.

- - - - -

VÖDS VERATIK

Utan, kel drimon neito, muton galikön delo.

MUSIGABOK BÄLDIK

In cem obik musigabok
stanon in gul nilo lä lok;
stanon us ya sis yels mödik,
ya sis dels cilüpa obik.
Ag! äjäfob so vilöfo
me on as cil, e frediko
ädanüdob in cem smalik
ko mot - ag! in cilüp läbik.
Ätakädon fe ün hitüp
boso, ye dü fluküp, nifüp
bo äpläyon dü yels mödik
lidis, lidis neglômovik.
Cilüp jönik enepubon,
ko mot i läb emoikon.
Musigabok us ön seil
drimon dö mot, drimon dö cil.
Mot takädoſ dis krod e ston;
cil sis lunüp edaülön.
Ye tim jönik reton in mem
nog dub musigabok in cem.

▼ ▼ ▼ ▼ ▼ ▼ ▼ ▼

KIM BINOM - LI?

Tonat balid binon in cem,
i dabinon in pem e dem.
Tonat telid binon in dun,
ab no in spun, u mun, u lun.
Tonat kilid = vokat folid!
Tonat folid binon in lasil,
ab no in fil, u pil, u dil.
Tonat lulid binon in mon,
! dabinon in lon e kron.
Tonat lätik - in limonad,
ab no in stad, u zitronad.

Pösod tefik binon Lamerikānan,
kel ädatuvom - pleidik länan!
Kim binom-li?

- - - - -

Tuvedot binon : ON
E

If no nog ākanol tuvön nemi at.
tuvedot lölik opubon in dabükot
okömöl „Vöga Volapüka.”

NUNILS SE YOL LÖLIK

SIRKUDABER LÄTIKÜN

Sirkudaber lätikün in Greta-Britän edetävon lü lom nulik in Kanadän. Hiel „Fred,” kel binon ber blägik Lamerikänik bäldotü lifayels deg, olödon in topäd sefik, kö okanon sogön oki lä bers votik pro naed balid dü lif lölik oka, e kö olabon svimöpi lönik.

LEJENÖF LALKOHOLIK

Ma nolavans, drog säbrietiköl, kel gegivon sunädo takedi e bitikami gudik, kanon fütüro binön jenöfot. Vestigans Lamerikänik edientifükons breinaproteini soelik, kel jinon leglididön tefü brietükam menik. Cedoms, das tüv at kanon mögükön drogi, kel omledükon vobedi lalkohola, e kel vifiko osäbrietükon pösodi.

KROKOD DEIDIK PEDIENTIFÜKÖL

Poldanef in Laustralän enunon, das edeldoy krokodi, kel, ma ced valemik, ifidon mani bäldotü lifayels teldegtel. Ädesinoy ad maikötön nimi ad sukön koapadiledis oma. Kälädans ejütöns krokodi nilü top kö hiel Brett Mann päsnapom de fium tü del 21-id dekula.

SAUNÖ I

Leefad bäldik in Tailanän egeton tutemi mekavik. El „Morakot,” leefad labü lifayels jöldeg, nimifanäv lä legad in provin vesüdik ela Kanchanaburi, no äkanon maskön zibi, bi lperon tutis oka; sekü atos, nimisanan efimükom tutemi mekavik in mud nima, ed anu juiton zibi äs büo.

JENOT BEFEITOVIK

Lanamalädan päcödetadeidom in Tats Pebalöl bü brefüp demü deid, ün yel 1979, viktualitedana, kel iflenikon ko om. Lavogans omik vaniko äblöfädoms, das Tat no ökanon lono cödetadeidön hiele Charles Singleton, bäldotü lifayels foldegfol.